




Divain Mersi

Ol pre bilong Marimari bilong God

Ol pre bilong Marimari bilong God

Divain Mersi

© IVE Fathers in Papua New Guinea
ive.png@gmail.com

INSAIT

1 - TOK BILONG POP SANTU JON POL 2.....	1
2 - LAIP STORI BILONG SANTU SISTA FAUSTINA.....	3
3 - LOTU BILONG MARIMARI BILONG GOD	
WANPELA ROT SISTA FAUSTINA I SKULIM MIPELA	7
1) As tru bilong Lotu bilong Marimari bilong God	7
2) Piksa bilong Divain Mersi.....	9
3) Pestode bilong Marimari bilong God.....	13
4) Liklik Korona bilong Marimari bilong God.....	27
5) Aua bilong Marimari bilong God	29
6) Helpim narapela long save na onaim Marimari bilong God	32
4 - SAMPELA PRE BILONG SISTA FAUSTINA.....	35
1) Litani bilong Marimari bilong God	35
2) Pre long taim bilong adoresen long Blesed Sakramen	40
3) Pre tenkyu	41

4) Askim long Marimari bilong olgeta hap bilong graun.....	41
5) Pre bilong helpim Sios na ol pris	42
6) Pre bilong helpim kantri bilong mi.....	43
7) Pre bilong laikim God tru.....	44
8) Pre long save long God	44
9) Ol sotpela pre bilong trastim God	44
10) Narapela pre bilong trastim God	45
11) Pre bilong askim grasia bilong marimari long wanpela narapela	46
12) Ol pre bilong helpim ol sinmanmeri long tanim bel.....	47
13) Ol pre long taim bilong karim pen	48
14) Ol pre bilong askim gutpela indai.....	49
15) Ol pre i go long Mama bilong God	50

1

TOK BILONG POP SANTU JON POL 2

«Katolik Sios i ting, namba wan wok bilong em long olgeta taim, na long taim bilong nau moa yet, em i olsem: skulim ol pipel long Marimari bilong God i pulap tru long Jisas Krais. Dispela Marimari em i as tru bilong laip bilong Sios olsem komuniti bilong ol bilipmanmeri, na long wan wan man bilong graun. Dispela laip, em i narakain laip olsem laip bilong dispela graun na em i bihainim narapela kain lo.

Katolik Sios i tok: dispela Marimari bilong God i kamap ples klia long indai na kirap bilong Jisas. Sios i givim skul long dispela Marimari bilong God long kain kain we, na em i traim long bihainim em long helpim dispela graun na ol pipel i stap long em long kamap moa gutpela nau na bihain. Olgeta taim Sios i mas mekim pre, tasol moa yet nau, long wanem kain kain senis i wok long kamap. Sios i no ken lus tingting long olgeta hevi i stap

namel long ol manmeri bilong God, long wanem ol dispela hevi i stap namel long ol manmeri na ol i pretim long bagarapim ol. Ol dispela samting Katolik Sios i mas mekim bilong inapim wok Jisas i makim long em, na bilong helpim ol manmeri bilong dispela graun».

(Dives in Misericordia 14-15)

2

LAIP STORI BILONG SANTU SISTA FAUSTINA

Laip na wok bilong Sista Faustina i soim olsem wanem mipela i mas bihainim skul bilong Marimari bilong God: autim em long arapela, bihainim long laip na mekim pre bilong kisim em.

Mama i karim Faustina long yia 1905 long pies Glogoviets. Em i namba 3 pikinini namel long 10-pela long famili bilong Maryanne na Stanislav Kowalski. Taim em i pikinini yet, em i gat laik long mekim pre na long helpim ol arapela na long harim tok. Faustina i bin sori tu long tarangu em i bin lukim. Em i bin pinisim greit 3 tasol long skul na bihain em i bin lusim famili bilong em na i go long mekim wok olsem wasmeri i lukautim ol pikinini na haus bilong ol arapela famili. Long taim em i gat 20 krismas, em i bin joinim ol Sista bilong Mama bilong Marimari. Wantaim ol dispela lain Sista em i bin stap 13 yia, inap long taim em i dai pinis. Faustina i bin mekim kain kain wok olsem sista: kukmeri, wok

gaden na wasmeri bilong dua bilong konven. Laip bilong em, em i wankain olsem laip bilong ol arapela sista, tasol insait long em, em i bin mekim bikpela wok bilong pas wantaim God na bihainim laik bilong em. Taim em i pikinini yet, em i gat laik long kamap santu, na em i mekim wok bilong dispela laik i kamap tru. Em i bin bihainim laik bilong Jisas na wok bung wantaim em long painim ol pipel i lusim God. Em i mekim dispela wok inap long taim em i ofaim laip bilong em olsem ofa bilong helpim ol sinmanmeri na em i dai. Ol yia em i stap long konven, em i bin karim planti hevi, tasol Jisas i strongim em wantaim kain kain grasia bilong helpim em. Long dispela sista Jisas i bin tok olsem: «Long Olpela Testamen mi bin salim ol profet long stretim lain pipel bilong mi wantaim strongpela tok na klaut i paia, nau mi salim yu long olgeta manmeri wantaim Marimari bilong mi. Mi no laik bagarapim ol manmeri i karim kain kain hevi na pen, mi laik oraitim ol na bringim ol i kam insait long Hat bilong mi i pulap long Marimari» (Da 1588). Jisas i makim dispela wok long Sista Faustina: «Tokaut gen long dispela tok i stap long Baibel: God i laikim olgeta manmeri na i laik soim marimari long ol, maski ol i bikpela sinmanmeri».

Jisas i bin askim em long mekim pre bilong askim Marimari bilong God na lotuim em long nupela we Jisas i skulim em. Kirapim muvmen bilong ol pipel bilong skulim ol manmeni long Marimari bilong God, mekim pre bilong kisim em long ol,

na mekim wok bilong kamap holi wantaim pasin bilong trastim God na laikim wanpela narapela.

Sista Faustina bin dal long talm em i gat 33 krismas, long de 5 Oktoba 1938 long siti Krakov. Long namba wan Sande bihain long Ista, de 18 April 1993 Papa Santu Jon Pol 2 i bin tokaut long misa em bin wokim long Rom: «Sista Faustina, em i wanpela blessed bilong Katolik Sios». Long dispela taim Pop i bin tok olsem: «God i bin tok long yumi wantaim ol dispela samting em i bin wokim insalt long laip bilong Sista Faustina. Em i bin skulim yumi long Marimari bilong God, long trastim em olgeta. God i bin givim em kain kain grasia bilong pilim Marimari bilong em long kain kain we, na tu long kain kain pre em i mekim». Jon Pol 2 I bin tok moa olsem: «Sista Faustina, mi tok tenkyu long yu, bikos yu tokaut gen long olgeta manmeri long bikpela marimari bilong God. Dispela marimari olgeta manmeri i nidim nau tru». Long de 30 April 2000 Papa santu i tokaut long Rom: «Sista Faustina, em i wanpela santu long Katolik Sios».

3

LOTU BILONG MARIMARI BILONG GOD WANPELA ROT SANTU SISTA FAUSTINA I SKULIM MIPELA

1 - As tru bilong lotu bilong marimari bilong God

Trastim God

Dispela pasin i soim olsem wanem mipela i mas stap na wokabaut wantaim God. Em i no hop tasol mipela i gat long God. Dispela pasin bilong trastim God i bungim bilip bilong mipela wantaim daunpasin na laik bilong bihainim lo bilong God. Na sori long ol sin mipela i bin mekim. Em i pasin bilong pikinini i trastim olgeta long marimari na strong bilong Papa.

Dispela pasin bilong trastim God em i as tru bilong lotu bilong marimari bilong God. Sapos i no gat dispela pasin, dispela lotu i no trupela. Pasin bilong trastim God i save helpim ol husat i

bihainim em long kisim marimari bilong God. Jisas i tok: «Planti grasia mi laik givim long ol manmeri i trastim marimari bilong mi. Olgeta pipel i mas kam klostu long mi, bikos marimari bilong mi i olsem solwara na i no gat pinis bilong em. Tasol ol i mas trastim mi. Ol sin manmeri bai kamap gutpela moa. Husat i trastim mi, em bai kisim bel isi long taim bilong indai» (Da 1502).

Trastim God, em tu i rot bilong kisim planti grasia. Jisas i tok long Sista Faustina olsem: «Ol grasia bilong marimari bilong mi ol i ken kisim wantaim wanpela kap em i pasin bilong trastim. Husat i trastim moa, em bai i kisim moa. Mi amamas tru long taim mi lukim ol manmeri i trastim mi, bikos long dispela man o meri mi ken kapsaitim kain kain grasia. Mi amamas, sapos ol i askim planti, bikos mi laik givim planti» (Da 1578).

«Husat i trastim mi olgeta, em i ken amamas tru, bikos mi yet lukautim em» (Da 1273). «Husat i singaut long marimari bilong mi, em i save kisim em, i nogat wanpela husat i askim na em i no kisim» (Da 1541).

Pasin bilong marimari long ol arapela pipel

Jisas i tok long Sista Faustina olsem: «Mi laik bai yu mekim pasin marimari, bikos yu laikim mi. Yu mas marimari olgeta taim na long olgeta pipel, yu no ken les long em. Mi givim yu tripela we bilong tok marimari na pre bilong kisim marimari. Long dispela

tripela we pasin bilong kisim marimari long ol arapela i kamap tru na husat i mekim em, em i soim em i laikim mi tru. Long dispela we man o meri i mekim lotu long Marimari bilong God na litimapim em» (Da 742).

Pasin bilong mekim marimari long ol arapela em i rot tru bilong kisim marimari. «Husat i no marimari long ol arapela, em bai i no inap kisim marimari long taim bilong kot. Sapos ol pipel i marimari long wanpela narapela na i bungim ol dispela pasin olsem ol i bungim mani long benk, ol bai i no inap go long kot. Marimari ol i bin mekim bat i karamapim stretpela kot bilong mi» (Da 1317).

Jisasi laik bai ol manmeri i lotu long Marimari bilong em, ol i mas mekim wanpela pasin marimari long arapela long olgeta de. Jisas i tok long Sista Faustina olsem: «Hat bilong mi, em i olsem solwara bilong marimari, long em mi kapsaitim ol grasia i go long olgeta hap bilong graun. Mi laik bai hat bilong yu tu i pulap long marimari, na dispela marimari i kapsait long hat bilong yu i ken go long olgeta pipel. Husat i kam klostu long yu, em i no ken lusim yu, sapos em i no trastim long Marimari bilong mi, mi laikim dispela pasin marimari tumas» (Da 1777).

2 - Piksa bilong Marimari bilong God

Long de 22 Februari 1931 Sista Faustina i lukim Jisas long wanpela visin na Jisas i askim em long peintim wanpela piksa em

i bin lukim long dispela visin wantaim tok i stap aninit long em:

Jisas, mi trastim yu.

Long dispela piksa mipela i lukim Jisas, husat i kirap pinis long indai. Long ol han na lek bilong em i gat ol mak bilong nil. Long sait wanpela soldia i bin sutim long spia, taim Jisas i bin dai pinis (dispela mipela i no lukim, em i stap hait long narapela piksa) tupela lait i kamaut: wanpela waitpela na narapela retpela. Taim Sista Faustina i askim Jisas long mining bilong dispela tupela lait Jisas i bin tok olsem: «Waitpela lait i makim wara, i mekim ol pipel i kamap orait, na retpela i makim blut, em i laip bilong ol. Dispela tupela lait i bin lusim Marimari bilong mi, long taim ol i sutim santu Hat bilong mi long spia long diwai kros» (Da 299).

Dispela tupela lait i makim tu ol sakramen bilong Sios, na tu ol i makim Sios yet, em i bin kamap long sait bilong Jisas ol i bin sutim. Narapela mining bilong tupela lait i olsem: ol i makim presen bilong Holi Spirit, Baibel i skulim mipela long ol, na wara em i mak long ol. Jisas i tok: «Man o meri i stap aninit long dispela tupela lait na tupela karamapim ol, ol i ken amamas bikos stretpela han bilong God bai no kisim ol» (Da 299).

Dispela piksa, em i mak bilong bikpela Marimari bilong God, i bin kamap ples klia long Misteri bilong Indai na Kirap bilong Jisas, na em karim kaikai long Katolik Sios taim em i wokim na givim ol sakramen. Dispela piksa i olsem wanpela kap bilong kisim grasia, na tu em i mak bilong tokim gen ol pipel long trastim God,

na mekim marimari long wanpela narapela. Jisas i askim long raitim wanpela tok aninit long dispela piksa Jisas: «**Mi trastim yu**», bilong rimaundim ol manmeri ol i mas trastim God oltaim.

Jisas i tok moa olsem: «Dispela piksa i mas tokaut gen long ol manmeri, ol i mas marimari long wanpela narapela, bikos sapos ol i gat bilip tasol na i no gat pasin marimari, dispela bilip i no inap helpim ol» (Da 742).

Ona mipela i givim long dispela piksa, em i olsem: mipela i mas trastim God na mekim pasin marimari. Husat i bihainim olsem dispela pasin bilong onarim Holi Piksa, Jisas i promisim em bai i kisim em long heven, givim em grasia bilong kamap gutpela kristen, grasia bilong gutpela indai na narapela kain kain grasia bilong helpim em long sindaun gut long dispela graun. Jisas i tok: «Mi givim ol manmeri wanpela kap bilong kam long mi na kisim grasia. Dispela kap em i piksa wantaim tok: “**Jisas, mi trastim yu**”» (Da 327). «Long dispela piksa mi laik givim planti kain kain grasia, olsem na ol pipel i mas save long em, bilong kamap klostu long mi» (Da 570). «Mi promis, husat i onaim dispela piksa long we mi bai soim em bai em i no inap lus. Mi promisim em bai em i winim ol birua bilong em long dispela graun na long taim bilong indai bai mi sambai long em» (Da 480).

«Marimari bilong mi i kukim mi olsem paia, mi laik kapsaitim long ol pipel. Dispela ol manmeri i no laik kisim em, ol i mekim mi i karim bikpela pen». Jisas i tokim Sista Faustina olsem: «Tokim ol pipel i

karim bikipela hevi ol i mas kam klostu long hat bilong mi, em i pulap long marimari, bai ol inap long painim bel isi» (Da 1074). «Ol pipel bai i no inap long painim bel isi inap long taim ol bai trastim mi na kam klostu long mi» (Da 300). «Yu tokim ol long bikipela marimari bilong mi. Olgeta manmeri i mas save long marimari bilong mi i no gat pinis long em. Dispela marimari em i samting bilong ol las de. Bihain de bilong stretpela kot bai i kamap. Ol i gat taim yet bilong kam long marimari bilong mi. Ol i mas kam aninit long blut na wara i bin kapsait long taim mi dai» (Da 848). Jisas i bin tok moa olsem: «Bihain bai mi kam olsem stretpela jas. Tasol bipo long dispela taim mi opim dua bilong marimari bilong mi long olgeta manmeri. Husat i no laik go long dua bilong marimari, em i mas i go long dua bilong stretpela kot bilong mi» (Da 1146).

Pre bilong trastim long Marimari bilong God

O Jisas, marimari bilong yu i no gat pinis bilong em, na i pulap long ol grasia, mi trastim olgeta long em. Dispela marimari i winim olgeta pasin bilong yu. Mi givim mi yet olgeta long yu bilong kamap moa gutpela na holi. Mi laik tokaut long bikipela marimari bilong yu long taim mi mekim pasin marimari long ol arapela. Helpim bodi na sol bilong ol. Taim mi wok bilong helpim ol manmeri long tanim bel, yu yet yu helpim ol husat i gat sik na bel bilong ol i gat hevi. Sambai long mi, O Jisas, olsem

samting bilong yu yet. Sampela taim mi pret na guria, bikos mi save mi no gat strong na mi meri bilong sin, tasol mi trastim long marimari bilong yu. Mi laik bai olgeta manmeri i save long marimari bilong yu, bai ol i trastim long em na litimapim em oltaim oltaim. Amen.

3 - Pestode bilong Marimari bilong God

Jisas i gat bikipela laik bai Katolik Sios i selebreitim Pestode bilong Marimari bilong God. Em i laik bai mipela i mekim dispela long namba wan sande bihain long Ista, bikos dispela tupela pestode i bung wantaim bilong soim bikipela Marimari bilong God. Liturgi bilong namba wan Sande bihain long Ista i litimapim God long marimari bilong em. Jisas i laik bai dispela de em i no de bilong litimapim Marimari bilong God tasol. Em i laik bai long dispela de planti manmeri i kisim marimari, na moa yet ol dispela manmeri i mekim bikipela sin na ol i stap longwe long God. Jisas i mekim bikipela promis husat i kisim Holi Komunio long dispela Pestode, bai em i kisim pogivim bilong ol sin bilong em na ol panismen dispela sin i bin kamapim. Em i dispela kain grasia mipela i save kisim long sakramen bilong baptais. Bikipela namba bilong dispela pestode i go olsem: olgeta manmeri (na tu ol husat i tanim bel pinis long dispela de tasol), olgeta i ken kisim kain kain grasia bilong helpim.

Jisas i tokim Sista Faustina moa olsem: «Mi laik bai dispela piksa mi askim yu long peintim i ken kisim blesim long dispela pestode» (Da 49).

«Mi laik bai dispela pestode i olsem wanpela de bilong helpim olgeta manmeri, tasol moa yet long ol dispela lain pipel i mekim bikpela sin na i stap longwe tru long mi. Long dispela de dua bilong marimari i stap op, solwara bilong marimari bilong mi i redi long kapsait long ol husat i kam klostu long mi. Man o meri i go long konpesio na komunio long dispela de, em bai kisim pogiv bilong ol sin bilong em na olgeta panismen ol dispela sin i bin kamapim. Long dispela de olgeta dua bilong kisim grasia i stap op. Ol pipel i no ken pret long kam klostu long mi, maski ol sin bilong ol i bikpela tru» (Da 699).

«Pestode bilong Marimari bilong mi i bin kamap long lewa bilong mi, bilong helpim na givim amamas long olgeta pipel» (Da 1517). «Mi tok “yesa” long em insait long tingting na laik bilong mi» (Da 420).

Novina bipo long Pestode bilong Marimari

Bilong redim mipela yet long selebreitim pestode, mipela i ken mekim wanpela novina (9-pela de pre), na statim em long Gut Fraide. Long dispela 9-pela de mipela i pre liklik Korona bilong Marimari bilong God. Long *Daieri* («Da», em i wanpela buk Sista

Faustina i raitim taim Jisas i skulim em long marimari bilong God) i gat narapela novina Jisas i skulim Faustina yet long mekim. Ol manmeri i ken yusim em tu, olsem mipela i putim em hia.

Jisas i tokim Sista Faustina olsem: «Mi laik bai yu bringim long marimari bilong mi, long 9-pela de kain kain ol pipel, bai ol i ken kisim strong na kain grasia ol i nidim long laip bilong ol na long taim bilong dai. Wan wan de bai yu bringim narapela lain bilong ol pipel insait long Hat bilong mi na putim ol insait long solwara bilong marimari bilong mi. Mi yet, bai kisim ol dispela manmeri na bringim ol long haus bilong Papa bilong mi. Long wan wan de bai yu askim Papa long givim grasia long ol na ofaim em olgeta pen mi bin karim long taim bilong dai bilong mi».

De namba 1

Jisas i askim Sista Faustina: «Tude bringim i kam long mi olgeta manmeri na moa yet ol dispela manmeri i mekim bikpela sin. Putim ol long solwara bilong marimari bilong mi. Long dispela we bai yu givim amamas long Hat bilong mi i karim bikpela pen taim mi lukim ol pipel i lusim mi na i go nabaut».

O Jisas, yu man bilong marimari. Yu laik pogivim rong bilong mipela oltaim. Yu no ken lukluk long ol sin bilong mipela. Lukluk tasol olsem wanem mipela i trastim marimari bilong yu i no gat pinis long em. Kisim mipela olgeta insait long Hat bilong yu i

gutpela olgeta, na yu no ken larim mipela i lusim Hat bilong yu. Mipela i askim yu long dispela long bikpela laik yu serim wantaim Papa na wantaim Holi Spirit.

God, Papa bilong oltaim, lukluk wantaim marimari bilong yu long olgeta pipel bilong graun, tasol moa yet long ol sin manmeri, ol i tarangu tru, ol i stap long Hat bilong Jisas. Tingim Pen bilong em na soim marimari bilong yu long ol, bai ol i ken litimapim bikpela strong bilong marimari bilong yu, oltatim oltaim. Amen.

De namba 2

«Tude bringim ol pris, ol sista na bruda, na putim ol long solwara bilong marimari bilong mi. Ol i bin givim mi strong bilong karim pen taim mi laik dai. Long han bilong ol tasol, marimari bilong mi i go long olgeta pipel».

O gutpela Jisas, man bilong marimari, yu tasol yu as bilong olgeta gutpela samting. Pulapim mipela moa yet long grasia bilong yu, bai mipela i mekim ol wok marimari, na taim mipela i mekim dispela wok ol arapela husat i lukim, ol i ken litimapim nem bilong Papa bilong marimari i stap long heven.

God, Papa bilong oltaim, lukluk wantaim marimari long ol dispela pipel yu bin makim bilong mekim wok long gaden wain bilong yu, em ol pris na ol sista na ol bruda. Pulapim ol long

blesim bilong yu. Lukluk long Hat bilong Pikinini bilong yu, ol dispela lain i stap insait long em. Givim ol pawa na lait bilong yu, bai ol inap long bringim ol arapela manmeri wantaim i go long bikpela marimari bilong yu, nau na oltaim. Amen.

De namba 3

«Tude bringim ol manmeri i bihainim stret Tok na Lo bilong mi, na putim ol i go long solwara bilong marimari bilong mi. Dispela lain manmeri i bin strongim mi taim mi karim diwai kros. Ol dispela lain i bin mekim mi stap bel isi, taim planti taim arapela i bin givim baksait long mi na putim hevi long mi».

O gutpela Jisas, yu man bilong marimari. Yu save givim ol grasia bilong yu long olgeta pipel. Kisim mipela olgeta insait long Hat bilong yu i gutpela tru, na i no ken larim mipela i lusim em. Mipela i askim yu long ol dispela samting wantaim bikpela laik yu gat long Papa bilong yu.

God, Papa bilong oltaim, lukluk wantaim marimari long ol dispela pipel i bihainim stret Tok na Lo bilong yu. Ol i wanlain wantaim Jisas. Lukluk long Pen bilong em na blesim ol, na lukautim ol oltaim bai ol i no ken lusim dispela stretpela pasin na bilip ol i gat, tasol bai ol i litimapim marimari bilong yu wantaim olgeta ensel na ol santu, nau na oltaim. Amen.

De namba 4

«Tude bringim ol haiden na ol dispela pipel i no save long mi yet. Mi tingting long ol taim mi karim pen na i dai. Bel bilong mi bai amamas long taim mi lukim ol i tanim bel na bilip long mi. Putim ol dispela lain long marimari bilong mi».

O gutpela Jisas, man bilong marimari. Yu yet, yu lait bilong dispela graun. Kisim i kam insait long hat bilong yu i gutpela olgeta ol haiden na ol husat i no save long yu yet. Mekim grasia bilong yu i laitim ol, bai ol i litimapim bikpela marimari bilong yu wantaim mipela, na yu no ken larim ol i lusim Hat bilong yu i gutpela olgeta.

God, Papa bilong oltaim, lukluk wantaim marimari long ol haiden na long dispela lain i no save yet long yu. Ol i stap insait long Hat bilong Jisas. Helpim ol long bilip long Gutnius, bai ol i ken save long dispela bikpela amamas bilong laikim yu, na bai ol i ken litimapim marimari bilong yu tu, nau na oltaim. Amen.

De namba 5

«Tude bringim ol manmeri bilong ol arapela lotu na putim ol long solwara bilong marimari bilong mi. Long taim mi karim pen na mi dai, ol i bin brukim bodi na Hat bilong mi, em i Sios bilong mi. Long taim ol i kam bek na kamap wanbel wantaim Katolik

Sios, ol sua bilong mi i orait gen, na long dispela we ol i pinisim pen bilong mi».

O gutpela Jisas, man bilong marimari, yu no ken givim baksait long ol. Kisim i kam insait long Hat bilong yu ol dispela manmeri, ol i bratasusa bilong mipela, tasol ol i no stap wanbel wantaim Katolik Sios. Helpim ol long kam bek na kamap wanbel wantaim mipela. Yu no ken larim ol i lusim Hat bilong yu i gutpela tru, tasol mekim bai ol i litimapim marimari bilong yu.

God, Papa bilong oltaim, lukluk wantaim marimari bilong yu long ol manmeri bilong ol arapela lotu, na moa yet long ol dispela i bin lusim ol grasia bilong yu long taim ol i strong long bihainim pasin na tok bilong ol yet. Yu no ken lukluk long ol rong bilong ol. Lukluk tasol long laik na pen bilong Jisas, husat i laik kisim bek ol, bai ol tu i stap long Hat bilong em. Mekim bai dispela lain tu i litimapim marimari bilong yu, nau na oltaim. Amen.

De namba 6

«Tude bringim ol manmeri husat i karim hevi na wari wantaim ol i bel isi na i bihainim daunpasin. Bringim tu ol pikinini na putim ol long solwara bilong marimari bilong mi. Ol dispela lain manmeri i klostu wankain olem Hat bilong mi. Ol i bin strongim mi long taim mi pilim pen bipo mi dai. Mi bin lukluk long ol olem ol ensel bilong dispela graun ol i was na pre klostu long alta bilong mi. Mi

kapsaitim planti grasia long ol, bikos ol i manmeri i daunim ol yet. Ol tasol inap kisim kain kain grasia na mi trastim ol olgeta».

O gutpela Jisas, man bilong marimari. Yu tok: «Mi yet, mi man bilong daunpasin na yupela i mas lainim na bihainim dispela pasin». Kisim na putim insait long Hat bilong yu ol dispela kain manmeri na ol pikinini tu. Ol dispela lain i makim ol santu wantaim olgeta samting i stap long heven i amamas tru. God Papa i laikim ol tru. Ol i olsem wel i gat gutpela smel na olsem ol naispela plaua i bilasim alta bilong God. Ol dispela pipel i stap oltaim long Hat bilong yu, O Jisas, na i singim ona na litimapim marimari bilong God oltaim.

God, Papa bilong oltaim, lukluk wantaim marimari long ol manmeri bilong daunpasin na long ol pikinini ol i stap long Hat bilong Jisas i gutpela olgeta. Ol dispela pipel i klostu wankain olsem pikinini bilong yu. Laip bilong ol i olsem insens i gat naispela smel i go antap long alta bilong yu long heven. Papa bilong olgeta gutpela samting na Papa bilong marimari, mi askim yu wantaim laik yu gat long ol dispela kain manmeri, givim blesim bilong yu long olgeta hap bilong graun, bai olgeta pipel i bung wantaim bilong litimapim marimari bilong yu, nau na oltaim. Amen.

De namba 7

«Tude bringim ol pipel i save onarim marimari bilong mi na litimapim em. Putim ol tu long solwara bilong marimari bilong mi.

Ol dispela lain manmeri i sori tru long mi long taim mi karim pen na mi dai, na ol i save tru long tingting na wok bilong mi. Ol dispela lain pipel i olsem piksa tru bilong Hat bilong mi i gutpela olgeta. Ol dispela lain bai i lait tru long laip bilong oltaim. Ol dispela pipel bai i stap gut, bai i no gat wanpela namel long ol i go long paia bilong hel. Bai mi lukautim ol long taim bilong dai bilong ol».

Jisas, man bilong marimari, Hat bilong yu i pulap long laikpasin. Holim long Hat bilong yu ol pipel husat i onaim na litimapim marimari bilong yu. Ol dispela lain i strong tru wantaim pawa bilong God yet. Ol i go het bikos ol i trastim long marimari bilong yu, ol i wanbel wantaim yu. Ol i helpim olgeta manmeri na i karim ol olsem mama i helpim pikinini. Ol dispela lain pipel bai i no kisim save long stretpela kot bilong yu. Nogat. Marimari bilong yu bai i helpim ol.

God, Papa bilong oltaim, lukluk wantaim marimari bilong yu long ol pipel i save onaim na litimapim marimari bilong yu, em dispela pasin i winim olgeta narapela pasin bilong yu, na ol i stap long Hat bilong Jisas i gutpela tru. Ol dispela lain i bihainim tru Gutnius. Han bilong ol i pulap long pasin marimari ol i mekim. Hat bilong ol i amamas tru long singim song bilong litimapim nem bilong God bilong marimari. Mi askim yu, marimari long ol na inapim trast na hop ol i gat long yu. Larim promis bilong Jisas i kamap tru long laip bilong ol, bikos em yet i tok bai em i lukautim na sambai long ol kain pipel husat i onaim marimari bilong em. Amen.

De namba 8

«Tude bringim ol pipel i stap long klinpaia na putim ol long solwara bilong marimari bilong mi. Blut bilong mi i ron olsem wara bilong mekim ol i pilim kol long dispela paia ol i stap long em. Mi laikim ol dispela manmeri tumas. Ol i kompensetim stretpela kot bilong mi. Pawa i stap long han bilong yu bilong helpim ol. Kisim olgeta helpim i stap long Sios bilong mi, olsem ol indulgensia, na ofaim ol long ol dispela lain pipel. Sapos yu save long olgeta pen ol i karim, yu bai mekim kain kain sakrifais na pre bilong helpim ol bilong kamap stret olgeta bipo long stretpela kot bilong mi».

O Jisas, yu man bilong marimari. Yu yet yu tok: «Mi laikim marimari, olsem mi bringim ol dispela lain i stap long klinpaia long Hat bilong mi». Larim blut na wara i bin kapsait long Hat bilong yu taim yu dai pinis long daunim dispela paia i kukim ol, bai ol tu i ken singsing ona long marimari bilong yu.

God, Papa bilong oltaim, lukluk wantaim marimari long ol dispela manmeri i stap long klinpaia. Ol tu i stap long Hat bilong Pikinini bilong yu i gutpela tru. Mi askim tu, wantaim Pen na Indai bilong Jisas na olgeta hevi em i bin karim, soim marimari long ol dispela lain pipel i stap aninit long stretpela kot bilong yu. Lukim ol sua bilong Pikinini bilong yu Jisas, yu laikim em tumas, na marimari long ol, bikos mipela i bilip long strong na marimari bilong yu i no gat pinis long em. Amen.

De namba 9

«Tude bringim ol pipel husat i no bilip na ol husat i gat tupela tingting long mi, na putim ol long solwara bilong marimari bilong mi. Ol dispela kain manmeri i save mekim Hat bilong mi i pen tumas. Mi bin karim bikpela pen long taim mi pre long gaden Getsemani. Ol dispela pipel tasol, ol i as bilong tok bilong mi: “Papa, kisim dispela kap i go longwe long mi, sapos em i laik bilong yu”. Las sans bilong ol i olsem: ol i mas tanim bel na kam klostu long mi bilong kisim marimari bilong mi».

O Jisas, man bilong marimari, Yu gutpela olgeta. Mi bringim long Hat bilong yu ol dispela lain husat i no bilip tru long yu na i gat tupela tingting. Larim paia bilong laik pasin bilong yu i hatim ol, bikos ol i kol olsem ol daiman na ol i bin mekim yu pilim les long ol. O Jisas, yusim pawa bilong marimari bilong yu i no gat pinis bilong em na bringim ol dispela pipel long paia bilong laik bilong yu na laikim ol, long wanem yu gat pawa bilong mekim olgeta samting.

God, Papa bilong oltaim, lukluk wantaim marimari long ol dispela lain pipel. Ol tu i stap insait long Hat bilong Pikinini bilong yu i gutpela olgeta. Papa bilong marimari, mi askim yu na ofaim Pen na Indai bilong Jisas na tripela aua pen em i bin karim bipo em i dai. Larim ol dispela manmen i tanim bel na litimapim marimari bilong yu i no gat pinis bilong em, nau na oltaim. Amen. (Da 1209 - 1229).

Rot bilong selebretim Pestode bilong Marimari

Jisas i tokim Sista Faustina olsem em i gat bikpela laik bai long dispela de piksa bilong marimari bilong God i kisim blesim na pablik ona long taim bilong lotu. Jisas i laik bai ol pris i tokim ol pipel long bikpela marimari bilong God i no gat pinis long em. Jisas i mekim ol bikpela promis bilong dispela pestode. Sapos ol manmeri i laik kisim ol samting Jisas i bin promisim, ol i mas i gat grasia long hat bilong ol (ol i mas i go long konpesio pastaim), na bihainim tupela samting bilong lotuim Marimari bilong God: trastim God olgeta na mekim pasin marimari long narapela, na tu ol i mas kisim Holi Komunio long dispela de.

Sakramen bilong Marimari na kamap wanbel - Konpesio

(Ol tok Jisas i bin autim long Sista Faustina)

«Olgeta taim yu go long konpesio -em i sakramen bilong marimari bilong mi- blut bilong mi na wara i kapsait long yu. Ol i bin kamaut long Hat bilong mi long taim mi bin dai na ol i mekim yu i naispela moa. Taim yu go long konpesio, yu mas trastim mi olgeta, bikos long taim mi lukim dispela pasin bilong yu, bai mi kapsaitim planti grasia bilong mi long yu. Yu mas save, mi yet mi wetim yu long konpesio. Mi stap insait

long pris yu lukim na mi yet mekim wok. Long dispela sakramen ol sin na wari na hevi bilong ol husat i kam long konpesio i bungim God bilong marimari. Tokim ol pipel, ol i ken kisim grasia bilong dispela sakramen, sapos ol i kam wantaim pasin bilong trastim mi. Sapos trast bilong ol i bikpela moa, bai ol i kisim planti moa grasia. Ol grasia bilong mi i save kapsait long ol manmeri i bihainim daunpasin. Ol hambak pipel ol i rabis tru na ol i no inap kisim grasia, bikos ol i no tanim bel na mi no laikim kain pasin olsem» (Da 1602).

«Tokim ol pipel ol i ken painim amamas na bel isi long sakramen bilong marimari bilong mi. Insait long dispela sakramen bikpela mirakel i save kamap: mirakel bilong pogivim sin na mekim manmeri i kamap nupela gen. Sapos man o meri i laik bai dispela mirakel i kamap long em, em i no mas wokabaut i go longwe. Nogat tru. Em i mas go long konpesio tasol na autim sin na wari bilong em long pris na dispela mirakel bilong marimari bai i kamap ples klia. Sapos sampela manmeri i stap olsem ol daiman bikos sin i pulap long ol na ol i lusim pinis hop, Marimari bilong God inap long kirapim dispela man o meri na mekim em i orait gen. Ol tarangu manmeri husat i no laik bai dispela mirakel bilong Marimari bilong God i kamap long laip bilong ol, biahin bal ol i singaut long mi, tasol em bal i let tumas» (Da 1448).

Holi Komunio

Husat i laik kisim ol grasia Jisas i promisim long Pestode bilong Marimari, em i mas kam long misa na kisim Holi Komunio. Jisas i tokim Sista Faustina olsem: «Mi laik stap wanbel wantaim ol manmeri, mi amamas taim mi stap wantaim ol. Taim ol i kisim Holi Komunio, mi kam na stap wantaim ol, na han bilong mi i pulap long kain kain grasia mi laik givim ol. Tasol planti taim ol pipel i no tingim mi. Ol i lusim tingting long mi na ol i bisi long narapela samting. Long dispela taim mi pilim pen, bikos ol dispela manmeri i no save long mi na long laikim pasin bilong mi» (Da 385). «Mi pilim draipela pen long taim ol pipel i no laik kisim Holi Komunio na kamap wanbel wantaim mi. Mi wetim ol, tasol ol i no tingim mi. Mi laikim ol olgeta, tasol ol i no trastim mi. Mi laik kapsaitim ol kain grasia, tasol ol i no laik i kam klostu long mi bilong kisim. Ol i lukluk long mi olsem samting i no gat laip long em. Tasol Hat bilong mi i pulap long laip na marimari na em i gutpela olgeta» (Da 1447).

Holi Komunio long laip bilong Sista Faustina

«Taim mi kisim Holi Komunio em i taim bilong bikpela amamas i winim olgeta narapela kain amamas. Mi gat bikpela mangal long kisim Bodi bilong Krais, na olgeta taim mi kisim Holi Komunio mi givim bikpela tok tenkyu long God Triwan» (Da 1804).

«Tude mi wet long wanpela king i kam. Mi yet mi samting nating, na yu Bikpela bilong mi, yu stap King bilong olgeta samting. O hat bilong mi, yu save husat bai i kam long yu tude? Yes, mi save, tasol mi no klia olgeta long dispela samting. Em i no king bilong dispela graun, em i wanpela king i winim olgeta arapela king. Em i Bikpela bilong olgeta samting. Olgeta pawa na strong bilong graun na skai i pret na guria long pes bilong em. Em tasol bai kam long mi tude. Mi harim em i stap klostu. Mi go hariap bilong welkamim em na bung wantaim em. Taim em i kam pinis long hat bilong mi bai mi pulap long bikpela ona na amamas i go long em, na bai mi brukim skru na adolim em. Jisas bai i kisim han bilong mi na i larim mi long sindaun klostu long em, na em bai i tokim mi olsem: “Lukim, mi lusim sia king bilong heven na kamdaun bilong bungim yu. Dispela samting yu lukim na pilim nau, em i liklik samting. Tasol bihain bai yu kirap nogut taim yu lukim mi long heven wantaim olgeta bilas na ona bilong mi. Mi soim yu dispela samting bilong skulim yu: laip bilong oltaim i stat long dispela graun yet long taim ol pipel i kisim Holi Komunio. Wan wan Holi Komunio i helpim yu long wokabaut wantaim God inap long taim yu bungim em tru long heven» (Da 810).

4 - Liklik Korona bilong Marimari bilong God

Jisas i skulim Sista Faustina wanpela pre yumi kolim «Liklik Korona bilong Manmari bilong God» long yia 1935 long ples ol

i kolim Vilno. Long dispela pre mipela i ofaim long God Papa «**Bodi na blut, sol na godpasin bilong Jisas**», na long dispela pre mipela i bung wantaim ofa em i bin mekim long Diwai Kros bilong kisim bek olgeta pipel. Taim mipela i ofaim long God Papa Pikinini bilong em, em i laikim tumas, mipela i gat strongpela as bilong harim pre bilong mipela. Mipela i askim long «**marimari long mipela na long olgeta pipel**». Dispela tok «mipela» i makim yumi yet na ol narapela mipela i laik pre bilong helpim ol. Tok «**olgeta manmeri bilong graun**» i makim olgeta pipel i stap long dispela graun na ol pipel i stap long klinpaia tu. Taim mipela i pre mipela i mekim pasin marimari long ol arapela na dispela pasin wantaim pasin bilong trastim God, tupela i as tru bilong kisim grasia bilong marimari bilong God. Jisas i tok long Sista Faustina olsem: «**Taim ol i pre dispela korona, mi promis long givim olgeta samting ol i askim mi**» (Da 1731). Bikpela promis bilong dispela korona i go long taim bilong indai: grasia bilong gutpela indai. Husat i pre dispela korona em yet i ken kisim dispela grasia. Na olgeta narapela tu sapos arapela pipel i pre klostu long taim ol i laik i dai. Jisas i tok: «Ol pris bai givim dispela pre olsem las sans bilong helpim. Sapos man o meri i bikpela sinmanmeri na em i pre dispela korona wanpela taim tasol, em bai kisim grasia bilong marimari bilong mi» (Da 687). Tasol em i mas pre dispela korona wantaim bilip na trast na trupela bel sori long ol sin bilong em.

Mipela i ken pre dispela korona olsem:

Bilong statim mipela i pre **Papa bilong mipela... Ave Maria...**

Mi bilip...

Long ol rosari bis i makim «Papa bilong mipela» mipela i no pre «Papa bilong mipela», tasol mipela i pre olsem:

God Papa bilong oltaim, mi ofaim long yu bodi na blut, sol na godpasin bilong Jisas Krais Pikinini bilong yu, yu laikim em tumas, na em i Bikpela bilong mipela, bai yu ken marimari na pogivim sin bilong mipela na sin bilong olgeta manmeri bilong graun.

Long ol rosari bis i makim «Ave Maria» mipela i pre:

God Papa, yu tingim pen bilong Jisas, na yu marimari long mipela na long olgeta manmeri bilong graun (10-pela taim).

Long taim mipela i pinisim «Liklik Korona» mipela i pre:

Santu God, Santu God i strong olgeta, Santu God bilong oltaim, yu marimari long mipela na long olgeta manmeri bilong graun (3-pela taim).

5 - Aua bilong Marimari bilong God - 3 kilok apinun

Jisas i tok long Sista Faustina olsem: «Sapos yu gat taim long dispela aua yu ken pre Rot bilong Diwai Kros. Sapos yu no inap, yu ken kam sotpela taim long haus lotu na onaim Hat bilong mi, em i pulap long marimari na i stap long Blesed Sakramen. Sapos

yu no inap long dispela tu, yu ken pre long ples yu stap long em» (Da 1572). «Long dispela aua yu ken kisim kain kain grasia bilong yu yet na bilong ol arapela» (Da 1572). «Mi no inap long sakim pre bilong man o meri husat i askim mi na ofaim pen na indai bilong mi wantaim» (Da 1320).

Ol pre mipela i ken yusim long aua bilong marimari

«O Blut na wara i bin kapsait long Hat bilong Jisas, yu as bilong marimari long mipela, mi trastim yu» (Da 187).

* * *

«O Jisas, yu yet i bin karim bikpela pen na yu dai, bikos yu laikim mipela. Strepela kot bilong Papa yu ken winim wantaim wanpela tok bilong yu, tasol yu bin karim ol pen na dai bilong soim bikpela marimari bilong yu long ol pipel. Taim yu dai pinis long diwai kros yu bin givim laip bilong oltaim long mipela. Taim yu larim ol long sutim na opim sait bilong yu long spia, yu bin opim as bilong marimari bilong yu i no gat pinis bilong em. Yu bin givim long mipela olgeta samting yu gat, em i blut na wara i bin kamaut long Hat bilong yu. Marimari bilong yu i no gat pinis long em i save kapsait long em tasol» (Da 1747).

* * *

«Jisas, Tok tru i stap oltaim oltaim. Yu laip bilong mipela. Mi krai na mi askim marimari bilong yu long olgeta sinmanmeri. Switpela Hat bilong Bikpela bilong mi i pulap long gutpela samting, mi askim yu long helpim ol. O Santu Hat, as bilong marimari, long yu tasol ol grasia i kapsait i go long olgeta manmeri. Mi askim yu long givim lait long ol sinmanmeri. Jisas, yu tingim Pen na Indai bilong yu na yu no ken larim ol dispela manmeri i lus, bikos yu dai pinis bilong kisim bek ol tu. O Jisas, taim mi tingim prais bilong blut bilong yu, yu bin kapsaitim bilong kisim bek mipela, mi amamas. Yu bin kapsaitim planti blut bikos yu save wanpela drop bilong blut bilong yu inap long kisim bek olgeta manmeri. Amamas bilong mi i pulap tru taim mi lukim dispela gutpela pasin bilong yu i no gat pinis bilong em. Mi laik bringim olgeta manmeri i kam klostu long yu bai ol i ken litimapim marimari bilong yu, nau na oltaim» (Da 72).

* * *

«O Jisas, yu dai long diwai kros, mi krai na askim yu bilong helpim mi long bihainim laik bilong God Papa long olgeta taim. Na long taim dispela laik bilong God i hat tumas long bihainim, mi askim yu, larim strong bilong yu i kam long ol sua bilong yu i

helpim mi, na maus bilong mi i ken autim dispela tok tasol: laik bilong God mi mas bihainim.

* * *

«O Ridima bilong dispela graun, yu laik bai olgeta manmeri i go long heven, na long dispela as tasol, yu bin lusim tingting long yu yet karim planti pen na hevi bilong helpim ol. Jisas, man bilong marimari, helpim mi long lusim tingting long mi yet, bal mi inap long helpim ol narapela, na long dispela rot helpim yuu long wok Ridima bilong yu na bihainim laik bilong Papa bilong yu» (Da 1265).

* * *

«Yu dai pinis, O Jisas, tasol laip bilong oltaim i bin kapsait na solwara bilong marimari bilong yu i stap op long olgeta pipel bilong graun. O Marimari bilong God, karamapim olgeta hap bilong graun na helpim mipela olgeta» (Da 1319).

*6 - Helpim narapela long save na onaim
Marimari bilong God*

«Ol manmeri, husat i helpim narapela long save na onaim marimari bilong mi, mi sambai long ol olsem mama i sambai long

pikinini bilong em, na long taim bilong indai bai mi no stap olsem jas long ol, tasol olsem God bilong marimari» (Da 1075).

Taim Jisas i singaut long onaim marimari bilong God na helpim ol pipel long save long dispela marimari, em i promisim pinis bikpela helpim long ol pipel, husat bai i mekim dispela wok. Bikpela promis em i bin givim long ol pater: «Ol manmeri i save mekim bikpela sin, bai ol i tanim bel, taim ol i harim dispela gutnius long bikpela marimari bilong mi. Ol pris, husat bai tokim ol pipel long bikpela marimari bilong mi, bai mi givim bikpela strong long tok ol bai mekim, na mi bai opim ol hat bilong ol pipel bilong harim tok bilong ol» (Da 1521).

* * *

Wok bilong onaim marimari bilong God na mekim wok bilong helpim narapela long save long em, em i laip bilong man o meri husat i trastim God i gutpela olgeta na soim pasin marimari long narapela. «Ol pipel, husat i onaim Marimari bilong God na helpim narapela long mekim olsem na trastim em, ol bai i no pret na guria long taim bilong indai. Marimari bilong mi bai i karamapim ol long dispela aua» (Da 540).

* * *

«O God, laikpasin bilong yu i no gat pinis bilong em. Mi laik bai olgeta manmeri yu bin mekim kamap i save long yu. Wapela laik i bin kamap insait long mi, na em i olsem: mi laik stap pris bilong tokim ol sinmanmeri husat i lusim hop pinis long bikpela marimari bilong yu. Mi laik kamap misinari na bringim lait bilong trupela bilip long ol kantri, bai ol haiden manmeri i stap long tudak i save long lait bilong yu. Mi laik lusim laip bilong mi long wankain pasin olsem Yu bin lusim laip bilong yu bilong helpim mipela. O Jisas, mi save pinis mi ken wok olsem pris na misinari, na lusim laip olsem wapela martir sapos mi givim baksait long laip bilong mi olgeta, bikos mi laikim yu na mi laikim olgeta arapela manmeri. Trupela laik pasin em inap long senisim liklik wok i go kamap bikpela wok» (Da 302).

«Mi gat bikpela laik bai olgeta manmeri i save long yu ol i bilip tru yu gutpela olgeta na litimapim marimari bilong yu oltaim. Long wanem, yu amamas tru bilong ol» (Da 305).

SAMPELA PRE BILONG SISTA FAUSTINA

1 - Litani bilong Marimari bilong God (Da 949)

Laikpasin bilong God em i olsem plaua, na marimari bilong em, em i olsem prut. Ol pipel i no trastim God tru, ol i mas ritim dispela litani na kamap lain pipel i trastim God olgeta.

Lida: Marimari bilong God i kapsait long bel bilong Papa...

Ol: *Mi trastim yu.*

Lida: Marimari bilong God, nambawan pasin bilong God...

Ol: *Mi trastim yu.*

Lida: Marimari bilong God, misteri manmeri i no inap long skelim na luksave long em...

Ol: *Mi trastim yu.*

Lida: Marimari bilong God, em i olsem wara i ron strong na i kam long God Triwan...

Ol: *Mi trastim yu.*

Lida: Marimari bilong God, ol manmeri na ol ensel i no klia tru long em...

Ol: *Mi trastim yu.*

Lida: Marimari bilong God, long yu tasol laip na amamas i save kamap...

Ol: *Mi trastim yu.*

Lida: Marimari bilong God, i winim samting bilong heven na graun...

Ol: *Mi trastim yu.*

Lida: Marimari bilong God, as bilong ol mak na mirakel...

Ol: *Mi trastim yu.*

Lida: Marimari bilong God, karamapim olgeta samting God i bin wokim pinis...

Ol: *Mi trastim yu.*

Lida: Marimari bilong God, i kam daun long graun olsem Tok bilong God...

Ol: *Mi trastim yu.*

Lida: Marimari bilong God, i bin kapsait long ol sua bilong Hat bilong Jisas...

Ol: *Mi trastim yu.*

Lida: Marimari bilong God, i stap long Hat bilong Jisas, em i bilong helpim yumi olgeta, tasol moa yet long ol bikpela sinmanmeri...

Ol: *Mi trastim yu.*

Lida: Marimari bilong God, i dip moa moa yet long Yukaris...

Ol: *Mi trastim yu.*

Lida: Marimari bilong God, i bin kamapim Holi Sios...

Ol: *Mi trastim yu.*

Lida: Marimari bilong God, long sakramen bilong Baptais...

Ol: *Mi trastim yu.*

Lida: Marimari bilong God, long wok ridima Jisas i bin mekim mipela i kamap stretpela long ai bilong God...

Ol: *Mi trastim yu.*

Lida: Marimari bilong God, i save wokabaut wantaim mipela long olgeta de long laip bilong mipela long dispela graun...

Ol: *Mi trastim yu.*

Lida: Marimari bilong God, i givim mipela laip bilong oltaim...

Ol: *Mi trastim yu.*

Lida: Marimari bilong God, i stap wantaim mipela long olgeta taim...

Ol: *Mi trastim yu.*

Lida: Marimari bilong God, i save haitim mipela bai mipela i no go long paia bilong hel...

Ol: *Mi trastim yu.*

Lida: Marimari bilong God, i save helpim ol bikpela sinmanmeri long tanim bel...

Ol: *Mi trastim yu.*

Lida: Marimari bilong God, mekim ol ensel i kirap nogut na tingting planti, na ol santu i no inap tu long skelim na luksave long em...

Ol: *Mi trastim yu.*

Lida: Marimari bilong God, i no gat wanpela i klia long dispela misteri bilong God...

Ol: *Mi trastim yu.*

Lida: Marimari bilong God, i kisim mipela long ol sin na wari na hevi bilong mipela...

Ol: *Mi trastim yu.*

Lida: Marimari bilong God, i as bilong amamas bilong mipela...

Ol: *Mi trastim yu.*

Lida: Marimari bilong God, i kisim mipela taim mipela i stap olsem samting nating na givim laip long mipela...

Ol: *Mi trastim yu.*

Lida: Marimari bilong God, i save karamapim olgeta wok bilong God...

Ol: *Mi trastim yu.*

Lida: Marimari bilong God, mipela olgeta i stap insait long em...

Ol: *Mi trastim yu.*

Lida: Marimari bilong God, i switpela marasin long olgeta i karim

pen na kain kain hevi na wari...

Ol: *Mi trastim yu.*

Lida: Marimari bilong God, wanpela rot tasol long givim hop long ol manmeri i laik lus...

Ol: *Mi trastim yu.*

Lida: Marimari bilong God, malolo bilong oltaim na bel isi long taim bilong pret...

Ol: *Mi trastim yu.*

Lida: Marimari bilong God, bikpela amamas bilong ol santu...

Ol: *Mi trastim yu.*

Lida: Marimari bilong God, mekim ol pipel i trastim gen long taim olgeta hop i lus pinis...

Ol: *Mi trastim yu.*

Yumi pre:

God Papa bilong oltaim, marimari bilong yu i no gat pinis bilong em. Yu pulap long bel isi. Lukluk wantaim marimari long mipela na mekim mipela i pulap long em, bai long taim bilong hevi na wari mipela i no lusim hop o pilim nogut tru. Nogat. Tasol wantaim bikpela trastim i go long yu, mipela i bihainim laik bilong yu, bikos yu God bilong marimari na yu gutpela olgeta (Da 950). O marimari bilong God i no gat pinis bilong em, i no gat man o meri inap long litimapim em tru. Yu winim olgeta samting bilong God na yu switpela hop bilong olgeta manmeri (Da 951).

2 - Pre long taim bilong adoresen long Blesed Sakramen

Mi litimapim yu, Bikpela bilong mi, yu bin mekim kamap olgeta samting, na nau yu stap long Blesed Sakramen. Mi litimapim yu long olgeta samting han bilong yu i bin mekim kamap, na dispela olgeta samting i soim gutpela tingting, marimari na gutpela pasin bilong yu. O Bikpela, yu bin bilasim dispela graun long planti gutpela samting, na dispela bilas bilong graun i soim yu mas stap naispela moa moa yet. Yu bin haitim dispela naispela bilas bilong yu long ai bilong mi, tasol wantaim bilip bilong mi, mi inap long save long yu, husat i bin mekim mi kamap, na hat bilong mi i pulap long pre i litimapim nem bilong yu.

Bikpela bilong mi, mi save, yu gutpela olgeta na long dispela save tasol mi no pret long toktok wantaim yu. Marimari bilong yu i bringim mitupela klostu, maski mi yet mi meri nating na yu Bikpela bilong mi. Toktok wantaim yu, O Bikpela bilong mi, i mekim hat bilong mi i amamas tru. Olgeta samting dispela hat i laikim, em long painim yu. Lait bilong yu i laitim tingting bilong mi na mi inap long save long yu moa moa yet. Taim mi stap na toktok wantaim yu, ol grasia i kapsait long hat bilong mi, na mi yet mi kisim laip i stap gut oltaim.

O Bikpela bilong mi, dispela olgeta grasia i samting nating, taim yu givim yu yet long mi na mitupela i kamap wanbel, maski mi samting nating. Hat bilong mitupela i stap wanbel tru, na

tupela i no nidim sampela toktok. Mitupela i toktok long narakain we ol arapela i no inap long save. Dispela samting em i wanpela misteri, em i misteri bilong marimari bilong Jisas em i mekim taim em i toktok wantaim wan wan man o meri long dispela gutpela pasin bilong yu, mi litimapim nem bilong yu, O Bikpela bilong mi, O God bilong mi, wantaim olgeta strong na save bilong mi. Maski strong na save bilong mi i liklik tru, tasol mi save yu laikim em, bikos em i kam long hat bilong mi i laikim yu tumas (Da 1092).

3 - Pre tenkyu

O Jisas, God bilong oltaim, mi tok tenkyu long yu long planti kain kain grasia bilong yu. Larim bai olgeta taim hat bilong mi i pait insait long bros bilong mi, long ol dispela taim i ken mekim singsing bilong tok tenkyu long yu, O God. Olgeta drop bilong blut bilong mi i save ron insait long mi, em i ron long yu tasol. Laip bilong mi, em i wanpela song bilong litimapim marimari bilong yu. Mi laikim yu, O God bilong mi, long yu yet tasol (Da 1794).

4 - Askim long Marimari bilong olgeta hap bilong graun

God bilong bikpela marimari, yu gutpela olgeta. Ol pipel bilong dispela graun i singaut long yu, bai yu ken marimari long

ol. Ol i singaut long yu bikos ol i gat kain kain wari na hevi. God bilong marimari, yu no ken rausim dispela pre bilong ol i tarangu tru. O Bikipela, yu yet, yu save long mipela na long olgeta wari na hevi bilong dispela graun, na yu tu i save mipela yet i no gat strong bilong kam klostu long yu. Olsem na mipela i krai long yu, helpim mipela wantaim grasia bilong yu, na pulapim mipela long marimari bilong yu, bai mipela inap long bihainim laik bilong yu long laip bilong mipela na moa yet long taim bilong indai. Larim marimari bilong yu i karamapim mipela. Sambai long mipela long taim ol birua bilong mipela i laik bagarapim mipela. Helpim mipela, bai mipela i trastim yu olsem ol pikinini i trastim papa, na bai mipela i ken wetim yu long kam bek long las de, dispela de yu tasol i save long em. Mipela i trastim bai mipela i ken kisim olgeta samting Jisas i promisim pinis, maski mipela i tarangu tru, bikos Jisas yet i trastim mipela. Mipela i go long heaven long wanpela dua, na dispela dua em i Hat bilong Jisas i pulap long marimari (Da 570).

5 - Pre bilong helpim Sios na ol pris

O Jisas bilong, mi askim yu bilong helpim Holi Sios bilong yu. Pulapim em long laikpasin na givim em lait bilong Holi Spirit bilong yu. Strongim olgeta tok ol pris i mekim bai olgeta manmeri i harim tok bilong ol na tanim bel na kambek long yu.

O Bikpela, salim ol pris long mipela, ol i gutpela na holi. Yu yet i ken strongim ol bai ol i no lusim dispela pasin bilong ol. Yu yet yu Pris bilong oltaim, larim pawa bilong marimari bilong yu i pas wantaim ol na sambai long ol long taim bilong traim bilong Satan, em i laik bagarapim ol oltaim. Larim pawa bilong marimari bilong yu i bagarapim olgeta samting i laik mekim ol pris i lusim pasin bilong stap gutpela na holi, bikos yu gat pawa bilong mekim olgeta samting (Da 1052).

O Jisas, mi laikim yu tumas, mi askim yu long helpim Sios bilong yu long winim olgeta samting bilong dispela graun (*kolim hevi bilong yu...*). Mi askim yu, blesim Papa Santu na olgeta bisop na pris. Mi askim yu long givim grasia bilong tanim bel long olgeta manmeri, na moa yet long ol husat i bin mekim bikpela sin. Mi laik askim yu long bikpela blesim bilong yu long ol pris husat bai i harim konpesio bilong mi (Da 240).

6 - Pre bilong helpim kantri bilong mi

O Jisas, man bilong marimari, mi askim yu wantaim ol santu bilong kantri bilong mi, na wantaim Mama Maria, em Mama bilong yu, yu laikim em tumas, givim blesim long kantri bilong mi. Yu no ken lukluk long ol sin bilong mipela. Nogat. Tasol lukluk long ol pikinini na ol hevi ol i karim, na long dispela as tasol givim kain grasia mipela i nidim long kantri bilong mi (Da 286).

7 - Pre bilong laikim God tru

O switpela Jisas, helpim mi long laikim yu moa moa yet, bai mi ken kamap wankain olsem yu yet na bai ol pasin mi mekim i givim bikpela amamas long yu. Larim Holi Komunio mi save kisim olgeta de i helpim mi long kamap olsem (Da 1289).

8 - Pre long save long God

Jisas, mi askim yu long givim mi gutpela na stretpela tingting, bai em i pulap long lait na bilip, na bai mi inap long save long yu moa moa yet. Sapos mi save tru long yu, bai mi tu inap long laikim yu moa moa yet. Jisas, mi askim yu long grasia bilong save long ol samting bilong God. Jisas, givim mi gutpela tingting na luksave long yu yet olsem God i stap wan wantaim Papa na Holi Spirit, bai mi ken save long laip bilong yu. Helpim mi long grasia bilong yu. Yu no ken larim kain askim olsem yu laikim dispela pre bilong mi o nogat, i kamap long tingting bilong mi gen (Da 1474).

9 - Ol sotpela pre bilong trastim God

O God bilong mi, yu yet, yu hop bilong mi, mi trastim yu olgeta na mi save bai yu no inap long lus tingting long mi (Da 317).

* * *

Mi save, Marimari bilong yu i gat olgeta pawa. Mi trastim yu bai yu givim olgeta samting mi nidim. Mi yet mi pikinini bilong yu i no gat strong (Da 898).

* * *

O Jisas, yu stap hait long Blesed Sakramen, yu marimari na gutpela olgeta. Mi givim long han bilong yu olgeta samting mi nidim. Yu inap long helpim mi, bikos yu yet yu marimari. Mi trastim yu olgeta (Da 1751).

10 - Narapela pre bilong trastim God

Mi ron i go long marimari bilong yu, O God, yu gutpela olgeta. Mi no gat strong na mi pulap long sin, tasol mi trastim bikpela marimari bilong yu, bikos yu God bilong marimari na i no gat wanpela man o meri husat i bin trastim yu na yu givim baksait long em.

O God bilong marimari, yu yet yu ken mekim mi gutpela na stretpela, na bai yu no inap rausim mi long taim mi kam klostu long Hat bilong yu wantaim bel bilong mi i sori tru, bikos husat i kam klostu long Hat bilong yu, maski em i bin mekim bikpela sin pinis, em bai painim marimari (Da 1730).

*11 - Pre bilong askim grasia
bilong marimari long wanpela narapela*

O Bikpela, mi laik kamap wankain olsem yu na stap olsem piksa tru bilong yu. Larim marimari bilong yu i pulapim hat bilong mi, bai mi ken marimari long ol arapela. Helpim mi, O Bikpela, bai ai bilong mi i pulap long marimari, bai mi no inap long skelim narapela, tasol bai mi inap lukim olgeta gutpela samting i stap insait long ol na hariap long helpim ol.

Helpim mi, O Bikpela, bai yau bilong mi i pulap long marimari, bai mi no inap pasim yau bilong mi long taim mi harim krai bilong ol bratasusa bilong mi, na long taim ol i nidim helpim bilong mi.

Helpim mi, O Bikpela, bai toktok bilong mi i pulap long marimari, bai mi no inap tok baksait na tok nogut long ol arapela, tasol bai mi tok bilong pogivim na givim amamas long ol.

Helpim mi, O Bikpela, bai han bilong mi i pulap long marimari, bai mi inap long go hariap bilong helpim ol arapela, maski mi yet mi no gat strong na nidim malolo, bikos trupela malolo bilong mi i stap long wok mi mekim bilong helpim narapela. Helpim mi, O Bikpela, bai hat bilong mi i pulap long marimari, bai mi pilim ol pen ol bratasusa bilong mi karim, bai mi no inap long pasim hat bilong mi long taim wanpela man o meri i askim helpim bilong mi. Mekim bai mi inap long helpim ol dispela pipel, husat i no

nidim helpim tru na ol i trikim mi. Mi bai pasim maus, taim mi yet mi karim pen na hevi. Larim marimari bilong yu, O Bikpela, i ken painim malolo insait long mi.

O Jisas, mekim mi i kamap wankain olsem yu yet, bikos yu gat pawa long mekim olgeta samting i kamap (Da 163).

12 - Ol pre bilong helpim ol sinmanmeri long tanim bel

God bilong bikpela marimari, yu bin salim Pikinini bilong yu olsem mak bilong soim yu laikim mipela tumas. Yu no laik rausim na bagarapim ol manmeri bilong sin, tasol yu bin opim dua bilong marimari bilong yu, bai ol i ken tanim bel na kam klostu na kisim dispela marimari na kamap holi pipel. Papa bilong bikpela marimari, mi laik bai olgeta pipel i trastim yu, God bilong Marimari. I no gat wanpela man o meri inap long stap stretpela long ai bilong yu, sapos marimari bilong yu i no helpim ol. Long wanem marimari bilong yu i bikpela tru, na mipela i no inap tenkim yu long em, maski mipela bai i stap longpela taim inap long oltaim oltaim (Da 1122).

* * *

O Jisas, mi sori tru long ol sinmanmeri. Jisas, givim ol grasia bilong tanim bel na long sori tru long ol. Mi save, marimari bilong

yu i no gat pinis bilong em. Mi no laik, bai wanpela man o meri, yu bin dai bilong kisim bek, ol i lus. O Jisas, givim mi ol dispela lain pipel, na kisim olgeta samting bilong mi. Mi laik kamap olsem ofa bilong helpim ol dispela manmeri. Dispela ofa mi laik mekim, yu tasol i ken lukim na ol arapela i no ken lukim, bikos yu tu i ofa i stap hait long hostia. Mekim mi i kamap wankain olsem yu, bai yu ken amamas long ofa bilong mi. Long wanem olgeta taim mi laik mekim dispela ofa bilong helpim ol sinmanmeri, mi laik mekim kompeiseisen long ol sin ol i bin mekim. O God bilong mi, Papa bilong bikpela marimari, mi trastim yu, bikos yu gutpela olgeta (Da 908).

13 - Ol pre long taim bilong karim pen

O Hostia i gat laip, strongim mi, mi wokabaut yet long dispela graun, bai mi inap long bihainim yu tru, Ridima bilong mi. Mi no askim yu, O Bikpela, long tekewe diwai kros na pen mi karim. Nogat. Mi askim yu tasol long givim mi strong bilong karim em. Mi laik hangamap wantaim yu long diwai kros na karim olgeta pen yu yet i bin karim. Mi laik dring long dispela kap bilong pen olgeta (Da 1484).

* * *

O Jisas, givim mi strong long karim pen, bai bel bilong mi i no sori na surik taim mi dringim kap bilong pen. Helpim mi, bai dipela ofa bilong mi i gutpela long ai bilong yu, bai no gat samting olsem mipasin i ken mekim em i nogut long ai bilong yu na yu no laikim em. Olgeta samting bilong mi i ken litimapim nem bilong yu, strong na wari bilong mi tu (Da 1740).

14 - Ol pre bilong askim gutpela indai

O Jisas bilong marimari, bipo long yu dai yu bin hangamap long diwai kros, tingim taim bilong dai bilong mipela. O Hat bilong Jisas i gutpela olgeta i stap op, bikos ol i sutim yu long spia, haitim mi insait long yu long taim bilong dai. O Blut na wara i bin kapsait long Hat bilong Jisas, wasim mi long ol sin bilong mi. O Jisas, tingim taim yu klostu laik i dai na karamapim olgeta belhat bilong God long aua bilong indai bilong mi (Da 813).

* * *

O Jisas, larim ol las de bilong wokabaut bilong mi long dispela graun i ken bihainim laik bilong yu. Olgeta pen na hevi bilong mi, mi bungim wantaim ofa bilong pen na dai bilong yu, na mi ofaim ol long olgeta pipel bilong graun, bai marimari bilong yu i ken kapsait long ol dispela pipel. Tasol moa yet long

ol husat i mekim bikpela sin. Mi trastim yu olgeta na mi givim mi yet long han bilong yu, bikos yu yet, yu Marimari, na bai dispela marimari i ken karamapim mi olgeta long taim bilong dai bilong mi (Da 1574).

15 - Ol pre i go long Mama bilong God

Maria, yu mama bilong mi, mi givim mi yet olgeta long han bilong yu: sol na bodi, laip na indai na olgeta samting i laik kamap bihain. Karamapim mi wantaim klos bilong klinpela pasin bilong yu, na helpim mi long stap klin long bodi na sol. Sambai long mi taim ol birua i stap klostu. O naispela lili plaua, mi laik kamap wankain olsem yu yet, O mama bilong mi (Da 79).

* * *

Mama bilong God, yu bin karim planti pen na wari. Lukluk long pikinini bilong yu na lainim em long pasin bilong karim pen na laikim narapela taim em i karim pen. Strongim em, bai em i no inap pundaun long taim bilong pen na wari. Mama bilong grasia, lainim mi long wokabaut gut wantaim God (Da 315).

* * *

O gutpela Mama bilong God, long laip bilong mi, mi laik bihainim pasin bilong yu, husat i pulap long lait na naispela tru. Ai bilong mi i amamas long lukim yu, O Mama, Virgo Imakulata. Yu piksaim lait bilong God. Yu skulim mi long laikim God, maski kain kain hevi na wari i pasim rot bilong mi. Sambai long mi na stap olsem wanpela klopait long taim ol birua i laik paitim mi (Da 1232).

«Olgeta pipel
i mas kam klostu long mi,
bikos marimari bilong mi
i olsem solwara
na i no gat pinis bilong em...
Husat i trastim mi olgeta,
em i ken amamas tru,
bikos mi yet lukautim em...»